

Ina renta da basa senza cundiziuns

Votaziun federala dals 5 da zercladur 2016

DA LUCAS DEPLAZES / ANR

■ **Cun ina iniziativa dal pievel preten- dan exponents d'ina nova cultura d'introducir per mintgin ina renta da basa senza cundiziuns. Ils 5 da zercladur proxim sto il suveran prender posiziun latiers. Il cussegl federal ed il parlament recumondan in na.** En ina conferenza da medias dad ier a Berna han ils exponents e promoturs da l'iniziativa dal pievel per ina renta da basa senza cundiziuns preschentà lur arguments en favur da l'idea innovativa e provocativa. Tenor il parairi dals iniziants duess mintga persuna sur 18 onns en Svizra retschaiver ina renta mensila da 2500 francs senza cundiziuns.

Ina nova filosofia da viver

Ils exponents dal comité da l'iniziativa èn da l'idea ch'il proceder da la produziun economica e la repartiziun dals bains terresters duain vegnir ponderads sut in nov aspect. La Svizra saja innovativa ed averta per novas ideas. Ils exponents da l'iniziativa crain ch'il product social restia pli u main il medem, la produziun vegnia dentant a sa midar radicalmain. Tenor lur parairi datti en l'avegnir ina midada drammatica, gea ina revoluziun dal mund da lavur che pretendia in nov patratgar. La filosofia d'ina renta da basa senza cundiziuns duai er daventar in nov dretg uman, acceptà dal pievel en in process democratic. A mintgin stoppia vegnir garantida ina vita en dignitad. L'idea d'ina renta gratuita correspundia er ad ina economia liberala.

Finanziaziun

La finanziaziun è la dumonda centrala, quai han ils exponents sa chapescha concedi. Els han er fatg lur ponderaziuns, senza dentant gia avair skizzà las lingias grondas da la nova lescha che stuess naturalmain suandar e reglar il proceder da fi-



Oswald Sigg propo- na d'engrevgiar il traf- fic cun ina taglia per financiar la renta da basa en il futur.

KEYSTONE

nanziaziun. Ils custs per financiar la nova renta muntan tenor il cussegl federal a 208 milliardas francs l'onn. La nova renta remplazzass naturalmain l'actuala renta da l'AVS e da l'IV, quai che fa var 55 milliardas francs. 128 milliardas francs stuess l'economia purtar, ina part pudess vegnir realisada cun reducir la lavur administrativa. La finala mancassan 25 milliardas francs ch'il pajataglia stuess surpigliar. Ils exponents han fatg attent a la gronda midada dals custs da produziun. Quests pudessan vegnir reducids massivamain. Sin la dumonda davart la motivaziun da far in studi u ina lavur difficila stentusa e da surpigliar responsabladad han ils exponents fatg allusiun ad ina retschertga en quest connex. Quella haja demussà che la renta da basa na tanschia betg per viver. Er en l'avegnir è necessari in gudogn supplementar. En mintga cas vegniss la lavur difficila e d'auta qualitat ad avair ina valita tut nova, bler pli auta.

Ils exponents da l'iniziativa na crain er betg che la nova renta manass ad in augment da l'immigraziun. Tgi che veglia prender domicil en Svizra stoppia disponer d'in plaz da lavur. Plinavant fiss l'idea er in motiv da discurren surlonder en l'UE.